

IKA-7 ARALIN

MAYROON

KANG

KATULONG



Sa Araling Ito'y Pag-aaralan Mo

Ang Espiritu Santo Ay Katulong Mo

Ang Bunga Ng Espiritu Santo

Paglakad Sa Espiritu

Ang Kapangyarihan Ng Espiritu Santo Sa Iyo

Mga Kaloob Ng Espiritu

Ang Espiritu Santo Ay Katulong Mo

Sa mga sandaling ito'y nasasabi mo marahil
"Naguguluhan ako. Hindi ko alam kung kaya
kong mamuhay ng isang Cristiano o hindi

Napakaraming bagay na dapat gawin, at ni hindi ko matandaang lahat, kaya't lalong hindi ko magagawa."

Huwag kang manlupaypay; hindi naman ito kasinghirap ng palagay mo pagka't dumating ang Espiritu Santo upang maging katulong mo. Ang buhay Cristiano ay hindi kalipunan ng mga batas, na dapat mong gawin, at pagsusumikap mong bumuti. Ito'y salig sa pagtanggap mo sa nagawa sa iyo ng Diyos, at pagpapaubaya sa Espiritu Santo na makapanahan sa iyo.

Ang Gagawin Mo

1. Sino ang Katulong na sinugo ng Diyos upang makasama mo sa lahat ng oras?
 - _____ a) isang pari
 - _____ b) isang pastor
 - _____ k) ang Espiritu Santo
2. Ang buhay Cristiano ay
 - _____ a) isang kalipunan ng mga tuntuning dapat mong sundin.
 - _____ b) ang patuloy mong pagsusumikap na bumuti.
 - _____ k) ang pagsisikap na maging gaya ni Cristo.
 - _____ d) ang pagpapaubaya sa Espiritu Santo na makapanahan sa iyo.

Mga Sagot: 1. k) Ang Espiritu Santo. 2. d) ang pagpapaubaya sa Espiritu Santo na makapanahan sa iyo.



Ang Espiritu Santo'y maaaring dumako sa lahat ng lugar nang sabay-sabay. Nang naririto sa lupa si Jesus, maaaring dumako Siya sa isang lugar sa isang panahon lamang. Nang magbalik Siya sa Langit, sinugo Niya ang Espiritu Santo upang manahanan sa atin, pumatnubay at tumulong sa ating mga suliranin.

Dadalangin ako sa Ama, at kayo'y bibigyan niya ng isa pang Mang-aaliw at magiging kasama ninyo magpakailanman. Nguni't ang Mang-aaliw, ang Espiritu Santo na susuguin ng Ama sa pangalan ko na siyang magtuturo sa inyo ng lahat ng bagay at magpapaalaala ng lahat ng sinabi Ko sa inyo. Juan 14:16,26.

Ang Gagawin Mo

3. Ang Espiritu Santo'y dumating upang
- a) makasama ng bawa't Cristiano sa lahat ng oras.
 - b) makasama ng ilan sa mga Cristiano.

Sagot: 3. a) makasama ng bawa't Cristiano sa lahat ng oras.

Ang Bunga Ng Espiritu Santo

Ang pananatili ng Espiritu Santo sa iyong buhay ay gumagawa ng bunga, at ito'y tinatawag na ang bunga ng Espiritu. Binibigyan ka Niya ng pagnanasang gumawa ng mabuti, at saka binibigyan ka Niya ng lakas na gawin ito. Habang napaakay ka sa Kanya at napatutulong sa ganitong paraan, lilikhaan ka Niya ng isang kahanga-hangang katauhang Cristiano. Parang masarap na prutas ang iyong maayos na pag-uugali, pagsasalita, at paggawa. Ikagagalak ng iyong pamilya at mga kaibigan na makapiling ka, subali't higit sa lahat ang bunga ng Espiritu ay makalulugod sa iyong Ama sa langit.

Subali't ang bunga ng Espiritu ay pag-ibig, kagalakan, kapayapaan, katiyagaan, kabaitan, kabutihan, katapatan, kahinahunan at pagpipigil sa sarili. Walang utos laban sa ganitong mga bagay. Galacia 5:22, 23

Napararangalan ang Ama kung kayo'y namumunga nang sagana at sa gayo'y napatutunayang mga alagad ko kayo. Juan 15:8

Ang Gagawin Mo

4. Ang "bunga ng Espiritu" ay
 - _____ a) mga kaluluwang naligtas sa isang kampanyang ebangelistiko.
 - _____ b) ang mabubuting katangiang ibinubunga sa ating katauhan ng Espiritu Santo.
5. Sauluhin ang Galacia 5:22, 23.

Sagot: 4. b) ang mabubuting katangiang ibinubunga sa ating katauhan ng Espiritu Santo.

Paglakad Sa Espiritu

Likas lang sa atin na pairalin ang sariling kagustuhan. Ganito ang likas ng tao. Ibig nating masunod ang ating kagustuhan sa halip na yaong dapat nating gawin. Kaya nga dapat tayong makinig sa panloob na tinig ng Espiritu Santo habang inuudyokan Niya tayong gumawa ng kalooban ng Diyos, at pinahahayag sa atin ang daan.

Ito ang sinasabi ko sa inyo: ang Espiritu ang gawin ninyong patnubay sa inyong buhay at huwag ninyong susundin ang pita ng laman. And Espiritu ang nagbibigay-buhay sa atin kaya ito rin ang dapat maghari sa ating mga buhay. Galacia 5:17, 25

Ang Gagawin Mo

6. Ang mga salitang “huwag ninyong susundin ang pita ng laman,” sa Galacia 5:16, ay nangangahulugang
- _____ a) hindi makakamit ang iyong kailangan.
 - _____ b) magiging bigo ka sa buhay.
 - _____ k) magtatagumpay ka sa likas na pagsunod sa iyong sariling kagustuhan.

Sagot: 6. k) magtatagumpay ka sa likas na pagsunod sa iyong sariling kagustuhan

Pangungunahan ka't palalakasin ng Espiritu ng Diyos nguni't hindi ka Niya papasanin paakyat sa langit. Dapat mong gamitin ang iyong mga paa. Makipagtulungan ka sa Espiritu Santo at hayaang Siya ang pumatnubay sa iyo. Ayon sa Biblia ito'y tinatawag na paglakad sa Espiritu. Ginagawa mo na ito sa pagbabasa ng Biblia at pagganap ng turo nito.



Ang Gagawin Mo

7. Ang paglakad sa Espiritu ay
- _____ a) pamumuhay sa walang katapusang kagalakan.
 - _____ b) pagsunod sa pangunguna ng Espiritu Santo sa iyong pang-araw-araw na gawain.

Sagot: 7. b) pagsunod sa pangunguna ng Espiritu Santo sa iyong pang-araw-araw na gawain.

Ang Kapangyarihan Ng Espiritu Santo Sa Iyo

Alam ni Jesus na kakailanganin ng Kanyang mga alagad ang kapangyarihang higit kaysa kanila sa paggawa ng dapat gawin para sa Diyos. Kaya't pinaghihintay silang mapuspos ng Espiritu Santo upang tumanggap ng kapangyarihang maging saksi Niya sa buong sanlibutan.

Hintayin ninyo roon ang ipinangako ng Ama, na sinabi Ko na sa inyo. Nagbautismo nga sa tubig si Juan, nguni't di na magtatagal at babautismuhan kayo sa Espiritu Santo. . . Ngunit's bibigyan kayo ng kapangyarihan pagbaba sa inyo ng Espiritu Santo, at kayo'y magiging mga saksi ko sa Jerusalem, sa buong Judea at Samaria, at hanggang sa dulo ng daigdig. Gawa 1:4,5,8.

Sinabi ni Juan tungkol kay Jesus:

Nguni't ang darating na kasunod ko ang magbabautismo sa inyo sa Espiritu Santo at sa apoy. Lucas 3:16.

Ang Gagawin Mo

8. Basahing makaitlo ang Gawa 1:4,5,8.
9. Sinabi ni Juan na si Jesus ay magbabautismo
 - _____ a) sa tubig tungo sa pag-sisisi.
 - _____ b) sa Espiritu Santo at sa apoy.

Sagot: 9. b) sa Espiritu Santo at sa apoy.

Nasa Aklat ng mga Gawa ang kapana-panabik na kasaysayan sa pagtupad ng Diyos ng pangakong ito sa Araw ng Pentecostes, at ang kahanga-hangang ibinunga.

At silang lahat ay napuspos ng Espiritu Santo at nagsalita ng iba't ibang wika, ayon sa ipinagkaloob sa kanila ng Espiritu. May mga Judiong buhat sa iba't ibang bansa na naninirahan noon sa Jerusalem, mga taong palasamba sa Diyos... Sa kanilang pagtataka ay kanilang nasabi: "Hindi ba Galileo silang lahat? mga taga Creta at mga taga Arabia. . . gayunma'y naririnig natin silang nagsasalita sa atin-ating wika tungkol sa mga kahanga-hangang gawa ng Diyos. Gawa 2:4,5,7,11.

Ang bautismong ito sa Espiritu Santo, o pagkapuspos ng Espiritu Santo, ay tinatawag ding karanasang Pentecostal, pagka't unang naganap ito noong Araw ng Pentecostes. Kapag ang isang tao'y nagsasalita sa ilalim ng kapangyarihan ng Espiritu Santo sa wikang hindi niya alam, tinatawag natin itong "*glossalalia*." Ito'y salitang Griyego na ang ibig sabihi'y "*pagsasalita sa iba't ibang wika*." Tinatawag ding "*karanasang charismatic*", mula sa salitang "*charisma*" na ang ibig sabihin ay kaloob. Ibig sabihin, ito'y isang kaloob ng Espiritu Santo at karanasang dipangkaraniwan.

Ang Gagawin Mo

10. Ang bautismo sa Espiritu Santo ay tinatawag na

_____ a) bautismo sa katawan ni Cristo.

_____ b) bautismong lubog.

_____ k) karanasang Pentecostal.

11. Ang pagsasalita sa ibang wika, sa ilalim ng kapangyarihan ng Espiritu Santo.

_____ a) ay glossalalia, o pagsasalita sa iba't ibang wika.

_____ b) ay glosaryo.

_____ k) ay kasanayan sa mga wika.

Mga Sagot: 10. k) karanasang Pentecostal. 11. a) ay glossalalia, o pagsasalita sa iba't ibang wika.

Ipinangako ni Jesus na bibigyan tayo ng kapangyarihan ng Espiritu Santo. Ang kapangyarihang ito ay para sa dalawang layunin:

▲ Upang tulungan tayong ibalita sa iba ang tungkol kay Jesus.

▲ Upang tulungan tayong manalangin nang lalong mabisa.

Sa pagsaksi at pagdalangin ng mga Cristiano, sa kapangyarihan ng Espiritu Santo, magaganap ang kahanga-hangang mga bagay bilang katu-gunan sa panalangin at manunumbalik sa Panginoon ang maraming kaluluwa.

Tumayo si Pedro, kasama ng labing-isang apostol, at nagsalita nang malakas. . . . kaya't ang mga naniwala sa Kanyang sinabi ay nagpabautismo; at nadagdag sa kanila ang may 3,000 tao nang araw na yaon. Gawa 2:14, 41

Silang lahat ay napuspos ng Espiritu Santo at buong tapang na nangaral ng salita ng Diyos. Gawa 4:31

Ang Gagawin Mo

12. Ang bautismo sa Espiritu Santo ay ibinigay upang magkaroon ng kapangyarihan ang mga Cristiano upang
- _____ a) sumaksi para kay Cristo at mabisang manalangin.
 - _____ b) papaniwalain ang iba sa kanilang kabanalan.
 - _____ k) gumawa ng mga himala.

Sagot: 12. a) sumaksi para kay Cristo at mabisang manalangin.

Ang kapangyarihang ito'y para rin sa mga Cristiano ngayon. Buhat nang magsimula ang Siglo 20, ilang angaw na buhat sa iba't ibang denominasyon sa buong daigdig ang nakalaspang karanasang Pentecostal, ang bautismo ng kapangyarihan.

Pagsisihan ninyo't talikdan ang inyong mga kasalanan at magpabautismo kayo sa pangalan ni Jesus-Cristo upang kayo'y patawarin; at ipagkakaloob sa inyo ang Espiritu Santo. Sapagka't ang pangko'y para sa inyo at sa inyong mga anak, at sa lahat ng nasa malayo — sa bawa't tatawagin ng Panginoong Diyos natin. Gawa 2:38,39.

Ang Gagawin Mo

13. Nais mo bang mapasaiyo ang kapangyarihang ito ng Espiritu Santo? Ibig mo bang mag-apoy sa iyong kaluluwa ang ningas ng Diyos upang mapadali ang pagsasabi sa iba tungkol sa Panginoon? _____ Ibig mo bang higit na maging mabisa ang panalangin mo? _____ Ito'y dapat mong maranasan. Hingin sa Diyos na bautismuhan ka sa Espiritu Santo. _____

Mga Kaloob Ng Espiritu

Nais ni Cristong mapuspos ng kapangyarihang espirituwal ang Kanyang Iglesya, kaya't may kaloob na iba't ibang kakayahan ang Espiritu Santo sa mga kaanib. Sa ganito'y magkakaroon ng bahagi ang bawa't kaanib sa gawain at paglago ng Iglesya.

Iba't iba ang kaloob, nguni't iisa lamang ang Espiritung nagkakaloob ng mga ito. Ang bawa't isa'y binigyan ng kaloob na naghahayag na sumasakanya ang Espiritu, para sa ikabubuti ng lahat . . . Nguni't iisa lamang Espiritu ang gumagawa ng lahat ng ito at namamahagi ng iba't ibang kaloob, ayon sa kanyang maibigan.

I Corinto 12:4,7,11.

Ang Gagawin Mo

14. Ang mga kaloob ng Espiritu Santo ay para sa
- ___ a) mga apostol ng Unang Iglesya lamang.
 - ___ b) mga mangangaral lamang.
 - ___ k) mga kaanib ng iglesya ngayon.
15. Idalanging ipagpatuloy ng Diyos ang Pentecostal na pagbabagong-buhay sa buong daigdig.
16. Idalanging pagkalooban ng Espiritu Santo ang mga kaanib sa inyong iglesya ng mga kaloob.

Sagot: 14. k) mga kaanib ng iglesya ngayon.